

兩
浙
名
賢
錄

兩浙名賢外錄卷之三目次

空空

漢

安清

三國吳

康僧會

支謙

晉

千歲和尚

惠雲附

竺曇猷

竺道潛

支遁

空空目次

卷之三

一

光緒

于法蘭

竺法興支法
淵于法道附

于法開

法威附

于道邃

竺法崇

道寶附

竺法曠

杯渡

竺道壹

帛道猷
道寶附

曇諦

曇彥

慧虔

史宗

帛僧光

曇蘭

淨度

竺法純

法宗

竺慧遠

僧翼

懷玉

慧理

智一

宋齊梁陳

曇摩密多

法願 法鏡附

慧靜

僧鏡 曇隆附

超進 曇機附

法瑤

法寵 智果僧叔附

法旻

慧皎

僧喬

慧開

法開

慧基

曇光

道慧

僧柔

智順

慧集

曇超

曇斐

明慶附

僧從

法匱

慧明

僧瑜

智稱

慧進

弘明

普遼

嵩頭陀

道琳

法慧 曇摩附

洪偃

真觀

僧護

傅大士

定光

明徹

曇穎

警韶 法藻附

智顗

淮頂

慧約

慧榮

法會

普明

僧安

稠錫

兩浙名賢外錄卷之三目次終

兩浙名賢外錄卷之三

東海徐象梅仲和氏謨

海鹽姚士麟叔祥氏閔

空空

漢 凡一人

安清

安清字世高，安息國王子也。讓國出家修道，博曉經藏，尤精阿毘曇學。既而遊方，徧歷諸國，以漢建和初到中夏，通習華言，宜譯諸經，多有神迹。既而適廣州，值寇亂。

路逢一少年，唾手拔刀曰：「真得汝矣！」高笑曰：「我宿命負卿，遠來相償，卿之忿怒，故是前世時意也。」乃延頸受刃，了無懼色。少年揮刀，觀者填陌，莫不駭其奇異。已而神識還爲安息王太子遊化中國，值靈帝末，關洛擾亂，乃振錫江南，復到廣州，尋其前世害已少年。時少年尚在，高徑投其家，說昔日償對之事，并敘宿緣，歡喜相向。云：「吾猶有餘報，今當往會稽，畢對廣州客。悟高非凡，豁然意解，追悔前愆，厚相資供，隨高東游，遂達會稽，至便入寺。正值市中有羣鬪者，誤傷高首，應時而殞。命廣州客

頻驗二報遂精勤佛法具說事緣遠近聞知莫不嘆異

三國吳 凡二人

康僧會

康僧會康居國人篤志好學明解三藏博覽六經天文
圖緯多所綜涉辨於樞機頗屬文翰時孫權已制江左
而佛教未行赤烏十年初達建業營立茅茨設像行道
時吳國初建沙門觀形而未及其道疑爲矯異有司奏
曰有胡人入境自稱沙門容服非常事應檢察權曰昔
漢明帝夢胡神號稱爲佛彼之所事豈其遺風耶召會

詰問有何靈驗。會曰：如來遷跡，忽逾千載，遺骨舍利，神耀無方。昔阿育王起塔，及八萬四千夫塔，寺之興以表遺化也。樵以爲誇誕，乃謂會曰：若能得舍利，當爲造塔。如其虛妄，國有常刑。會請期三七日，乃謂其屬曰：法之興廢，在此一舉。今不至誠，後將何及。乃共潔齋靜室，以銅瓶加几，燒香禮請。三七日暮，都無所見。莫不震懼。既入五更，忽聞瓶中鏘然有聲。會自往視，果獲舍利。明旦，樵自手執瓶，瀉於銅盤。舍利所衝，盤卽破碎。樵肅然驚起曰：希有之瑞也。會進而言曰：舍利威神，豈直光相而

已乃劫燒之火不能焚金剛之杵不能碎權令試之果如會言權大嗟伏卽爲建塔以始有佛寺故號建初名其里爲佛陀由是江左佛法大典孫皓嗣位益欽會神化於會所住更加修飾宣示宗室莫不尊崇會在吳朝亟說正法以皓兇粗不及妙義惟敘報應近事以開其心天紀四年皓降晉九年會遘疾而終至唐高宗永徽中復見形於越稱是游方僧而神氣瓌異見者悚然罔知階位時寺綱糾詰其由罵驅逐之會行及門乃語之曰吾康僧會也苟留吾真體福爾伽藍跬步之間立而

息絕。既而雙目微瞑。精爽不銷。舉手如迎揖狀。足跡似欲行者。衆議偃其靈輿。寘於窳窳。人力殫絕。略不傾移。遂遷於勝地。別立崇堂。越人競以香花燈燭。繒絲幡蓋。果實衣器。請祈心願。多偕人意。又嘗就閭閻家求草屨。至今越人多以芒屨上獻。感應盼蠻。多赴人家。不可周述。號超化禪師。

支謙

支謙字恭明。月支人。初漢桓靈之世。有支識者。譯出衆經。又有支亮。資學於識。而謙又受業於亮。博覽經籍。莫

不精究世間技藝多所綜習遍學異書通六國語其爲人細長黑瘦眼多白而睛黃時人爲之語曰支郎眼中黃形軀雖細是智囊漢末世亂避地會稽大帝聞其才慧召見悅之拜爲博士使輔導東宮與韋曜諸人共盡匡益謙以大教雖行而經多梵文未盡翻譯已妙善方言乃收集衆本譯爲漢語從吳黃武至建興中所出維摩大般泥洹法句瑞應本起等四十九經曲得聖義辭旨文雅又依無量壽中本起製菩薩連句梵唄三契并注了本生死等經皆行於世

晉 共一十三人

千歲和尚

惠雲附

千歲和尚，西域人。生於周末，魏晉時來游震旦，嘗不食，惟服鉛汞。一日示衆曰：「吾欲住世千歲，今已六百七十三年矣。」時號千歲和尚。唐貞觀中，周游兩浙，至諸暨里浦山下，遇一老人，問欲何之。師曰：「訪地修行，吾將老焉。」老人曰：「循山之陰，林嶂幽聳，中有石窟，如方丈。」號曰浦岩，宜有道居之。師抵岩下，見山秀泉潔，喜而作頌，有行盡支那四百州，此中偏稱道人游之句。遂結菴居之，名

其君曰實寧岩傍有方石師宴坐其上凡一十七年一
日屈指計之曰吾住世已一千七十三歲矣語其徒惠
雲曰吾將謝世遂授以還丹之術明日端坐而化惠雲
既得授丹術築室東岩之下九年丹成能使頂顱開闢
神通自在龍虎馴伏左右如侍者號伏虎禪師

竺曇猷

竺曇猷或云法猷燉煌人少苦行習禪定後遊江左止
剡之石城山乞食坐禪嘗行到一壘家乞食猷祝願畢
忽見蜈蚣從食中跳出獸快食無他後移始壘赤城山

石室坐禪。有猛虎數十。蹲在猷前。猷誦經如故。一虎獨
睡。猷以如意叩虎頭。問何不聽經。俄而羣虎皆去。有頃。
壯蛇競出。大十圍。循環往復。舉頭向猷。經半日。復去。後
一神現形。詣猷曰。法師威德既重。來止此山。弟子輒推
室相奉。猷曰。貧道尋山。願得相接。何不共住。神曰。弟子
無爲不爾。但部屬未洽。法化卒難。制語遠人來往。或相
侵觸。人神道異。是以去爾。猷曰。本是何神。居之乂近。今
者欲移何處。神曰。弟子夏帝之子。居於此山。二千餘年。
寒石山是我舅所治。當往彼住。尋還山陰廟。臨別執手。

贈猷香三奩於是鳴鞭吹角凌雲而去天台懸崖峻曉
峰嶺切天古老相傳云上有佳精舍得道者居之雖有
石橋跨澗而橫石斷人且莓苔青滑自終古以來無得
至者猷行至石橋聞空中聲曰知君誠篤今未得度却
後十年自當來也猷心悵然乃退晉太元中有妖星現
帝普下諸國有德沙門精勤佛事令懺穢災猷乃祈誠
冥感至六日旦見青衣小兒來悔過云橫勞法師是夕
星退太和末卒於山室尸猶平生而舉體綠色其後人
入山登岩見猷尸不朽

竺道潛

竺法友竺法蘊康法護竺法濟附

竺道潛字法深，姓王氏，瑯琊人。丞相武昌郡公襲之弟也。年十八出家，剪削浮華，崇本務學。微言興化，譽洽兩朝。風姿容貌堂堂如也。嘗講法華大品，既蘊深解，復暢妙辯。故觀風味道者，常數盈五百。永嘉初，避亂過江。文帝欽其風德，潛恒着屐上殿，尋隱迹剡山。優游講席者十餘年。或暢方等，或釋老莊，投身比面者，莫不內外兼洽。哀帝頻遣兩使徵請，御筵開講。於時簡文作相，以潛先朝友敬，頂戴兼常。迄乎黿飛，虔禮彌篤。潛常於簡文

處遇沛國劉恢恢嘲之曰道士何以游朱門潛曰君自
覩其朱門貧道見爲蓬戶尋還刻之岬山逍遙林阜以
畢餘年支道林遣使求買岬山之側沃洲小嶺欲爲幽
棲之處潛答云欲來輒給未聞巢由買山而隱以寧康
二年卒於山館春秋八十有九岬山復有竺法友者志
業強正博通衆典嘗從潛受阿毘曇一宿便誦潛曰經
目則諷見稱昔人若能仁更與大晉者必取汝爲五百
之一也竺法蘊悟解入玄尤善放光般若康法識亦有
義學之譽而以草諫知名嘗遇康昕昕自謂筆道遇識

識其所各作王右軍草傍人竊以爲貸莫之能別竺法
濟幼有才蒸作高逸沙門傳凡此四人者皆道潛之神
足云

支遁

支遁字道林河內林慮人少而任性獨往風期高亮家
世奉法常於餘杭山沉思道行泠然獨暢年二十五始
釋形入道王逸少作會稽道林在焉孫興公謂王曰支
道林拔新領異胸懷所及乃自佳卿欲見否王自有一
性儻氣殊自輕之後孫興公與支共載往王許王都領賦不

與交言。須臾支退。後正值王當行。車已在門。支語王曰。君未可去。貧道與君小語。因論莊子逍遙遊。支作數千言。才藻新奇。葩采映發。王遂披襟解帶。流留不能已。遂住靈嘉寺。已入沃州。小嶺建精舍。晚移石城山。樓光寺。嘗造卽色論。示王中郎。中郎都無言。支曰。默而議之乎。王曰。旣無文殊。誰能見賞。三乘佛家。滯義支分判。炳然云。正當得兩人。三使亂其談。善標宗會。而章句或有所遺。時爲守文者所陋。謝太傅聞而善之。曰。此乃九方甄之相馬。略其玄黃。取其駿逸。後至山陰。講維摩經。許掾

爲都講。支通一義四座莫不厭心。許送一難衆人莫不
抃舞。但共嗟咏。二家之美不辯其理之所在。支嘗養數
匹馬。或言道人畜馬不韻。支曰。貧道賞其神駿。性好
住東嶺山。有人遺其雙雀。少時翅長欲飛。支意惜之。乃
鍛其翮。雀軒翥不復能飛。乃反顧翅垂頭視之。如有懊
喪意。支曰。既有凌霄之姿。何肯爲人作耳目近玩。養令
翮成。置使飛去。卒葬新昌南明山下。戴安道嘗過之。歎
曰。德音未遠。而墓木已拱。冀神靈縣縣不與氣運俱盡
耳。遁有同學法虔。精理入神。先遁亡。遁歎曰。昔匠石磨

斤於郢人牙生輟絃於鍾子推已求人良不虛矣寶善
既潛法言莫賞中心蘊結余其亡乎乃著切悟章席亡
成之落筆而卒

于法蘭

三法典支法淵于法道附

于法蘭高陽人少有異操十五出家便以精勤爲業求
法問道必在衆先性好山泉多處岩壑嘗冬月雪深虎
來入室蘭神色無忤虎亦馴伏雪晴始去後聞江東山
水剡縣最奇乃徐步東甌遠矚嘒嶰居於石城山久之
愴然歎曰大法雖興經道多闕若一闕圓教必死可也

乃遠適西域，欲求異聞，至交州遇疾，終於象林，時年
通追立像讚曰：于氏超世，綜體玄旨，嘉趣山澤，仁感處
兒，又有所法，與支法淵于法道，與蘭同時，比德典以
見知名，淵以才著稱，道以義解，馳聲云。

于法開 法威附

于法開不知何許人，事蘭公爲弟子，深思開發，獨見言
表善放光及法華，又祖述耆婆妙通醫法，嘗乞食人家，
值婦人在草危急，衆治不驗，舉家遑遑，開曰：此爲難耳，
主人正宰羊，欲爲淫祀，開今先取少肉爲藥，連意因藥。

針之酒臾羊膜裹兒而出。每與支道林爭。卽色空義。廣江何默申明。開難高平都超宜述。林解並傳於世。開有弟子法威。清悟有樞辯。開嘗使威出都。經過山陰。支還正講小品。開語威言。道林講比汝至。當至某品中。示語攻難數十番。云此中舊難通耳。威既至郡。正值道講。果如開言。徃復多番。遁遂屈。因厲聲曰。君何足復受人寄載來耶。故東山諺云。冻量開思。林談議記。至哀帝時。累被徵詔。乃出京。講放光經。凡舊學抱疑。莫不因之披釋。謝安王文度悉皆友善。或問法師高明剛簡。何以醫術。

經懷答曰明六度以除四魔之病調九候以療風寒之疾自利利人不亦可乎年六十卒於石城縣綽爲之目曰才辯從橫以術數弘教其在關公乎

于道邃

于道邃，敬煌人，十六出家，事闍公爲弟子，學業高明，內外該覽，善方藥，美書札，洞諳殊俗，尤精談論，性好山澤，多游屨名山，爲人不屑毀譽，未嘗以塵迹經懷，後隨闍適西域，至交趾，遇疾而終，年僅三十有一，闍公常稱邃高簡，雖素有古人之風，若不無年方爲大法梁棟也，郗

超圖寫其形支遁爲著銘讚曰英英上人識通理清朗
質玉瑩德音蘭馨喻道論云洛中有竺法行談者以方
樂令江南有于道邃識者以對勝流

竺法崇

道寶附

竺法崇未詳何許人少入道以戒節見稱篤志經咒而
尤長法華一教居剡之葛峴山茅庵澗飲取欣悅慧與
隱士魯國孔淳之相遇每盤桓極日輒信宿忘歸披襟
領契自以爲得意之交崇歎曰緬想人外三十餘年傾
蓋於茲不覺老之將至尋卒於山中著法華義疏四卷

時剡東剡山復有釋道寶者本瑯琊王氏晉丞相導之弟也弱年信悟避世辭榮親舊諫止莫之能制香湯澡沐將就下髮乃詠曰安知萬里水初發濫觴時後以學行顯

竺法曠

竺法曠吳興人事沙門竺曇印爲師印嘗病篤曠投誠禮懺七日七夜忽見光明照印房戶如有人以手振之者所苦遂愈已辭師遠遊廣尋法要還止於潛青山石室每以法華爲會三之旨無量壽爲淨土之因常吟咏

二部有衆則講、獨處則誦、謝安爲吳興守、故往展敬、而山棲幽阻、車不通轍、於是解駕、山椒陵峯、步往簡文帝遣堂邑太守曲安遠、詔問起居、并咨以妖星、請曠爲力、曠與弟子齊懺、有頃災滅、尋東遊禹穴、觀矚山水、至若耶、愛孤潭峻潔、遂卓錫巖下、時東土多遇疾疫、曠旣少習慈悲、兼善神咒、遂遊行村里、拯救危急、身之所至、病者立起、有見鬼者、言曠之行止、常有鬼神數十、衛其前後、時沙門竺道隣、造無量壽像、曠乃率其有緣、起立大殿、伐木遇旱、曠咒令就水、元興元年卒、年七十有六、散

騎常侍顧愷之爲作讚傳

杯渡

杯渡不知名氏嘗乘木杯渡水人因目之年可四十許帶索縲纒殆不蔽身言語喜怒出沒不常或叩水洗浴或着屐登山或徒行入市惟荷一蘆園子更無餘物一日臨瓜步乞濟航人不肯遂累足杯中顧盼言詠不假風棹輕疾如飛直抵北岸渡不甚持齋飲酒噉肉至於辛鱸與俗無異百家奉供或受不受沛國劉興伯時爲兖州刺史遣使要之負圖而來興伯使人舉視十餘人

不勝與伯自看惟見一敗溺及一木杯與伯異之誠心
供養幾二十日清旦忽云欲得一餐爇中時令辦與伯
卽爲經營至中未成爇云暫出至瞑不返合境聞有異
香疑之爲惟處處覓渡乃見在北岩下敷敗絮爇於地
卧之而死頭前脚後皆生蓮花極鮮香一夕而葵邑共
殯葬之後數日有人從北來云渡頭蘆圖行向彭城復
東游入吳行至松江乃仰圖蓋水中乘而渡岸經涉會
稽剡縣登天台山數月而返金陵辭止無定請召或往
或往不召或自詣分身應化一時而有數杯渡神化

無方人莫能測時與人周靈期使高麗還值颶風船至
於海島登山見寺多是七寶莊嚴遇一聖僧叩頭乞指
歸路僧云此間去都二十餘萬里但令至心不要不速
因問云識杯渡道人否指其北壁有一壺掛錫杖及鉢
云此杯渡住處今因君以鉢與之并作書着函中別以
一青竹杖令靈期著船前水中自令速至靈期如言置
竹杖船前惟聞船從山頂樹木上過都不見水三日至
石頭崖而止亦不復見竹杖所在至來崔航見杯渡騎
大鯢龍以爲橋之目馬爲何不行觀者甚衆靈期作禮

以書鉢呈之。渡視書大笑曰：「使我還耶？」取鉢擲雲中。還接之曰：「我不見此鉢已四千年矣。」元嘉三年九月，行至赤山湖，示病而滅。衆共葬之建康覆舟山下。却後四年，吳興邵信病疫垂絕，無人敢視。乃悲泣念觀世音，忽見一僧來云：「是杯渡弟子。」慰言莫憂。家歸尋來相看。答云：「渡死已久，何容得來？」僧云：「來復何難？」便衣帶間出一合許散與服之。立愈。又有杜僧哀者，昔經伏事杯渡。見病甚篤，乃念不得渡與誦神咒。明日忽見渡來，卽爲咒病者。便愈。渡與門外一僧喚渡，便歸去云：「貧道嘗與交。」

聞不復來也。一日見形洛水上。衆杯而渡。衆皆大驚。遂
乃舉手語衆云。年當大凶。可勸修福業。法意道人甚有
德。可往就之。言訖不見。

竺道壹

帛道猷遺寶附

竺道壹姓陸氏。吳人。少出家。貞正有學業。而晦迹隱智。
人莫能知。與之又處方悟。其神出。嘗止瓦棺寺。從汰公
受學。數年之中。思微淵深。講傾都邑。汰有弟子曇壹。亦
雅有風操。時人呼曇壹爲大壹。道壹爲小壹。名德相繼。
爲時論所宗。時若耶山有帛道猷者。山陰人。少以篇牘。

著稱性率素好丘壑一吟一咏有豫上之風與道壹經
有講筵之遇後與壹書云始得優游山林之下縱心孔
釋之書觸興爲詩陵峯採藥服餌蠲疴樂有餘也但不
與足下同日以此爲恨耳因有詩曰連峯數千里修林
帶平津雲過遠山翳風至梗荒榛茹茨隱不見雞鳴知
有人閒步踐其徑處處見遺薪始知百代下故有上阜
民而壹得書既有契心抱乃東適耶溪與道猷相會遂
定交林下久之郡守王蒼於邑西起嘉祥寺以壹之風
德高遠請居僧首壹乃抽六物遺於寺造金牒千像壹

既傳通內外。又律行精嚴。故四遠僧尼咸依附。吞粟時人號曰九州都維那。隆安中遇疾而卒。世壽七十有一。孫綽爲之贊曰。馳辭說言。因緣不虛。惟茲壹公。綽然有餘。譬若春園。載芬載譽。條被猗蔚。枝幹森疎。壹弟子道實。姓張氏。亦吳人。聰慧夙成。尤善席上。張彭祖王秀琰皆見推重。並著莫逆之交。

曇諦

曇諦。吳興人。父彤。嘗爲冀州別駕。母黃。晝寢。見一僧呼之爲母。寄一塵尾。并鐵鑊。書鎮二枚。眠覺見兩物具在。

因而懷孕生諦諦年五歲母以塵尾等物示之諦曰秦
王所餉母曰汝置何處答云不憶至年十歲出家學不
從師悟自天發後隨父之樊鄧遇見關中僧碧道人忽
喚碧名碧曰童子何以呼宿老名諦曰向者忽言阿上
是諦沙彌爲衆僧採菜被野猪所傷不覺失聲耳碧經
爲弘覺法師弟子爲僧採菜被野猪所傷碧初不憶此
迺詣諦父諦父具說本末并示書鎮塵尾等碧迺悟而
泣曰卽先師弘覺法師也師經爲姚萇講法華貧道爲
都講姚萇餉師二物今遂在此追計弘覺涅槃正是寄

物之日復憶採菜之事。彌深悲仰。諦性愛林泉。復還吳興。入故章崑山。岩居谷飲。二十餘載。宋元嘉末卒。世壽六十餘。

曇彥

曇彥越州人。弘法寶林寺。身長五尺。眉垂數寸。時以爲肉身羅漢。嘗與許玄度詢同造磚木二塔。彥有神異。天降相輪能駐日。倍工復從地引其臂。至於塔頂。未就詢亡。久之至梁天監中。岳陽王來鎮會稽。彥預告門人曰。許玄度來也。岳陽亦早承誌。公密示。至州卽入寺尋訪。

彥望而呼曰許玄慶來何暮昔日浮圖今如故王曰弟子自姓蕭名譽彥曰未達宿命焉得知之遂握手命入室席地彥以三昧力加被王忽悟前身造塔之事宛如今日由是二塔益資壯麗時龍興大殿毀壞衆請彥重修彥曰非貧道緣力也却後二百有緋衣功德主來與此殿大作佛事寺衆刻石記之及唐裴休任越州觀察使興隆三寶傾施俸錢修成大殿方知彥師懸記無忒云

慧慶

慧度姓皇甫北地人少出家奉持戒行志操確然憩廬
山十有餘年道俗有業志勝途者莫不屬慕風彩羅什
新出諸經度志存敷顯宣揚德教乃東遊吳越賜地弘
通投山陰嘉祥寺克已導物苦身率衆凡諸新經皆書
寫講說涉將五載忽然得病寢疾少時自知必盡乃屬
想安養所誠觀音山陰北寺有淨嚴居宿德有戒行夜
夢觀音從西郭門入清輝妙狀光映日月幢幡華蓋皆
以七寶莊嚴云往嘉祥寺遇度公因爾無常侍者咸聞
異香久之乃歎

史宗

史宗不知何許人常著麻衣或重之爲衲故世號麻衣道士身多瘡疥性調不怙常在廣陵白土埭憑埭謳唱引絃以自欣暢得值隨以布施人栖息無定所或隱或顯時高平檀祗爲江都令聞而召來應對機捷無所拘滯傳達稽古辯說玄儒乃賦詩一首曰有欲苦不足無欲亦無憂未若清虛者帶索披玄裘浮遊一世間汎若不繫舟方當畢塵累栖志且山丘檀祗知非常人造還所在遺布二十匹悉以施人後南遊吳會嘗過魚梁見

漁人大捕宗乃上。泥洗浴羣魚皆散尋繇上虞龍山太
寺善談莊老究明論索而韜光隱迹世莫之知會稽謝
邵魏邁之放之等並爲論淵博皆師事焉後同止沙門
聞宗共語者頗說蓬萊上事曉便不知宗所之陶淵明
記土埭遇三異人史宗其一也或云有商人海行於
孤洲上見一沙門求寄書於史宗置書於船中同侶欲
看書書着船不脫及至白土埭書飛起就宗宗接而將
去

帛僧光

帛僧光或云曇光未詳何許人少習禪業晉永和初遊
於江東投剎之石城山山民咸云此山舊有猛獸之災
及山神縱暴人蹤久絕光了無懼色倩人開翦負杖而
前行入數里忽大風雨羣虎號鳴光於山南見一石室
遂止其中安禪合掌以爲棲神之處至明旦雨息乃入
村乞食夕復還其中經三日乃夢見山神自言移章安
縣韓石山住推室以相奉爾後薪採流通通俗宗事樂
禪來學者起茹茨於室側漸成蘭若因名隱岳光每入
定輒七日不起處山五十五年世壽一百一十歲太元

之末以衣蒙頭安坐而卒衆僧咸譌依常人定過七日
後惟其不起乃共看之顏色如常惟鼻中無氣神遷維
久而形骸不析至宋孝建三年郭鴻任剡人山禮拜訪
以如意撥胸竦然風起衣服消散唯白骨在焉鴻大愧
懼收之於室以塼壘其外而泥之西其形像於今尚存

曇蘭

曇蘭青州人太元中來游赤城遠結茆山下日誦經三
十萬言時時口吐青蓮花香滿山谷一日有金甲神身
長數丈屈膝自言此乃弟子世居大師德重願推室相

舉遂鼓角安虛而去世傳爲常鄉山神也

淨度

淨度餘杭人少好遊獵嘗射孕鹿墮胎鹿母銜痛猶就地舐子度乃心悔因摧弓折矢出家蔬食誦經三十餘萬言嘗獨處山澤坐禪習誦若邑中有齋集輒身燃九燈燭然達曙以爲供養如此者累年後忽令弟子辦香湯洗浴說法數十章戒以生死因果言訖奄然而化簫鼓香烟至空而去

竺法純

竺法純未詳何許人少出家止山陰顯義寺苦行有德
善誦古維摩經元興中爲寺上蘭渚買故屋暮還於湖
中遇風而船小將覆純一心不亂憑觀世音力口誦不
輟俄見一大船空中無人順流而下純得乘之獲免至
岸訪船無主頃臾不見道俗歎其神感後不知所終

法宗

法宗臨海人少好遊獵嘗射孕鹿墮胎鹿母銜箭舐子
宗乃悔悟知貪生愛子是有識所同遂毀弃弓矢出家
棄道常分衛自資受一食法蔬茹六時以懺先罪誦法

華維摩二經常升臺誦詠誓願四遠士庶稟其歸戒者
三千餘人遂相開所住以爲精舍因誦爲目號曰法華
臺也宗後不測所終

竺慧達

竺慧達西河離石人少好厥獵年三十許忽如暫死經
日始蘇備見地獄苦報見一道人云是其前世師爲其
說法訓誨令出家往丹陽會稽吳郡覓阿育王塔像禮
拜悔過以懺先罪既醒卽出家學道改名慧達精勤福
業惟以禮懺爲崇嘗夢至京師先是簡文帝於長

于寺造三層塔塔成連歲寧安放光達上越城顧望見
此塔杪獨有異色便往拜敬晨夕懇到夜見利下時有
光出乃告人共掘入地丈許得一金函中有三舍利一
成甲一髮髮伸長數尺卷則成螺光色炫耀乃周宣王
時阿育王起八萬四千塔此其一也既道俗歎異乃於
舊塔之西更豎一刹施安舍利達停止三年晝夜虔禮
未嘗暫廢頃之復遣會稽禮鄞縣塔此塔亦阿育王所
造歲久荒蕪示存基址達親心東想乃見神光歛發因
是修立龕砌羣鳥無敢栖集凡近寺側畋漁者必無所

復獲道俗傳歎莫不移信後郡守孟頴復加開撫達東
西觀禮屢表徵驗精誠篤勵終身無改後不知所之

僧翼

僧翼餘杭人少而信悟早有絕塵之操初出家止廬山
依慧遠修學蔬素苦節見重門人晚適關中復師羅什
經律數論並皆叅涉尋與同志曇學沙門俱遊會稽屢
訪山水至秦望西北見五岫駢峯有耆闍之狀乃結草
成庵稱曰法華精舍翼蔬食澗飲三十餘年卒世壽七
十立碑山寺旌其遺德文筆乃會稽孔道所製也曇學

後移卜秦望之北號曰樂林精舍有韶相淮蒨並東岳望僧咸共憇焉時有釋道敏者本瑯琊胄族右將軍王羲之曾孫避世出家情愛丘壑棲於若耶山立懸雷精舍敬後爲供養衆僧乃捨具足專精十戒云

懷玉

懷玉臨海人號高玉禪師修習方山法席頗盛持鉢應供者日數百人汲飲遠溪每用爲苦忽有一老父語師云庵側石下有泉也懷玉乃收錫率諸弟子共至其處舉錫三振泉流迸出方廣盈尺而一切灌漱洗濯炊煮

煮滹無不周給大煖集海其泉不減一勺卽今湧泉王
恩寺也

慧理

慧理西越人咸和初來游東土至明聖湖之北山登其
峯歎曰此乃中天竺國靈鷲山之小嶺不知何以飛來
僊靈隱窟今復爾耶因就洞呼曰黑白猿在石果有黑
白二猿應呼而出遂樹錫結庵名曰靈隱命其峯曰飛
來瘞骨之所名曰理公之塔

智一

智一不知其所自來居靈隱寺之半峯精守戒律而善長嘯嘯終乃牽曳其聲杳入雲際如吹箏葉若揭遊絲徐舉徐揚載哀載咽颼颼淒切聽者悲涼謂之哀松之梵頗生物善又於靈山澗邊養一白猿有時葛山踰澗久而不還一乃吮吻張喉作梵呼之則猿至矣時人謂之白猿梵名一公爲猿父猶云狙公也每至衆僧齋畢歛僧餘飯送猿臺所令山童呼三二聲則白猿自至因名其臺爲飯猿臺後唐武宗廢教伊寺毀除飯猿於臺事皆湮沒一公竟不知所終

宋齊梁陳

共五十四人

曇摩密多

曇摩密多此云法秀。屬賓人也。七歲出家。屬值明師。博
貫羣經。特深禪法。生而連眉。世號眉禪師。少好游方。誓
志宣化。周遊諸國。遂適龜茲。尋渡流沙。展轉至蜀。常以
江左王畿。志欲傳法。以宋元嘉元年。沿流東下。至於京
師。初止中興寺。晚憩祇洹。密多道聲素著。化洽支那。至
京甫通。傾都禮訊。自皇后太子。以及公主。莫不設齋。桂
宮請戒。椒掖會稽。太守平昌孟顗。深樂正法。以三寶爲

已任及臨浙右請與同游乃於鄞縣之山建立塔寺東
境舊俗多趣巫祝及妙化所移比屋歸正尋復還都止
鍾山定林下寺密多天性凝靜雅愛山水以鍾山鎮岳
埒美嵩華常歎下寺基構臨澗低側於是乘高相地揆
卜山形斬木刊石營建上寺士庶欽風成之不日息心
之衆萬里來集淨化久而莫渝勝業崇而勿替則神足
弟子達禪師之以也密多以元嘉十九年卒於上寺初
密多之發願實有迦毘羅神王衛送遂至龜茲於中路
欲反乃現形告別密多曰汝神力通變不行而至何不

相隨其往南方語畢卽收形不現遂遠從至都卽於上
寺圖像著壁至於今猶有聲影之驗

法願 法鏡附

法願吳興長城人姓王氏初名武厲家本事神身習鼓
舞世間雜伎及著爻占相皆備盡其妙嘗以鏡照面云
我不久當見天子於是出都以備相自業宗慙沈慶之
徵時經請願相願曰宗君應爲三州刺史沈君當位極
三公如是歷相衆人無不奇驗遂有聞於宋太祖宋太
祖見之取東冶四及一奴美顏色者飾以衣冠令願相

之願指四曰、君多危難、下階便應着錯鎖、謂奴曰、君是下賤人、乃暫得免耶、宋太祖異之、卽勅住後堂、知陰陽秘術、少時啟求出家、遂爲上定林遠公弟子、精心禪戒、又善唱導、及依經說法、率自心抱、無事官商、唯以適機爲要、王侯妃主及四遠士庶、並從受戒、一時以爲導師、時齊高帝親事幼主、恒有不測之憂、每以咨願、願曰、後七月當定、果如其言、及高帝卽位、事以師禮、後出憇湘官鑾、駕自幸、降寺省慰願云、脚疾未消、不堪相見、帝乃轉蹕而去、文惠太子嘗往寺問訊、願旣不命令、坐文惠

作禮而立乃謂願曰。祿吹清鐃以爲供養其福云何。願曰。昔菩薩八萬伎樂供養佛尚不如至心。今吹竹管子打死牛皮此何足道。其秉德邁時類如此。後人定三日不食。忽語弟子云。汝等失飯糲矣。俄而寢疾。時寺側遭火。寺在下風。烟燄將及。弟子欲輿願出寺。願曰。佛若被燒我何用活。卽苦心歸命。於是三面皆焚。惟寺不燼。卒年八十有七。弟子法鏡亦吳興人。幼而樂道。事未獲從。值慧益燒身。啓帝度二十人。鏡卽與其一。旣得入道。屢操冰霜。研習導唱。有邁終古。

慧靜

慧靜姓邵氏餘杭人居貧屢操厲行精苦始遊學廬山
晚還都進業解兼內外偏善涅槃初住冶城寺顏延之
何尚之並欽慕風德顏延之每歎曰荆山之玉惟靜是
焉及子峻出鎮東州携與同行因棲於天柱山寺尋遷
居剡之法華臺後憩東岬山飛錫所至並以弘法爲務
宋太始中卒世壽五十有八所著文翰集爲十卷

僧鏡

曇隆附

僧鏡姓焦氏隴西人遷居吳地出家華山寺後入關隴

尋師叅究法要累載還止都下大闢經論緇素翕然司
空徐湛之重其風素請爲一門之師東反姑蘓專當法
匠尋東適上虞徐山學徒隨往者百有餘人化洽三吳
聲馳上國陳郡謝靈運以德音致款宋元徽中卒世壽
六十有七上虞徐山先有曇隆道人少善席上晚忽苦
節過人亦爲謝靈運所重亡後靈運執筆爲誄

超進 曇機附

超進姓顓頊氏長安人篤志精勤幼而專學大小諸經
並所綜採戒行嚴潔早舉關中西虜寢陷長安法事罷

廢進乃避地東下止於京師更精尋經旨開暢講說時
平昌孟顓守在會稽迎置山陰靈嘉寺遂停止浙東講
論相續邑野僧尼服膺式範進又以大涅槃是窮理之
教每留思躊躇累加講說至年老失明猶令弟子誦唱
句中一遍其耽好若此宋元徽中卒世壽九十有四時
有曇機法師亦長安人避亂東下游觀山水至於會稽
善法華毘曇時世宗奉與進相次郡守王崑請居嘉祥
寺本崑祖蒼所創也

法瑤

法瑤姓楊氏河東人少而好學尋師萬里還遊兗豫貫
極衆經旁通異部嘗聽東阿靜公講衆屢請覆述靜默
曰吾不及也元嘉中過江吳興沈演之特深器重請住
武康小山寺坐閱十有九年自非所請說法未嘗出門
每歲開講三吳學者負笈盈衢乃著涅槃法華大品勝
鬘諸經義疏大明六年勅吳興郡禮致上京與道猷同
止新安寺使頓漸二悟義各有宗至便就講鑒輿降蹕
百辟陪筵瑤年雖遲暮而蔬苦弗改戒節精白爲道俗
所歸元徽中卒世壽七十有六

法寵 智果僧附

法寵姓馮氏海鹽人捨家服道止光興寺成辦法式習學威儀後從道猛曇濟二師學成實論復負笈諸方歷聽衆經微旨遂採玄析奧妙盡深極高難所指罕不倒戈齊竟陵王子良甚加禮遇嘗於西邸義集選請名學事委冶城智秀而競者尤多秀謂寵曰當此應對卿何如我答曰先悅後拒我不及卿詮名定實卿不如我秀有漸色大監七年勅住齊隆寺尋感風疾坐輿講說普通五年卒世壽七十有四勅葬定林時有沙門智果住

海壇光興寺清直平簡善諸經術又剡縣公車寺沙門
僧淑擢採衆師并爲已任隨問隨答思慮周廣雖有徵
駁而未盡其要妙也

法旻

法旻姓孫氏家於甯春吳大帝之裔七歲出家住虎丘
西山寺從僧廻學五經一聞能記精神洞出標羣獨秀
特進張緒見而歎曰松柏雖小已有凌雲之氣由是顯
譽年十三出都師莊嚴曇景與同學經論夕則合帳而
卧晝則假衣而行往返咨詢不避炎雪大明數論究統

卷本外

卷之三

七

光緒重

經律前疑往結靡不泐泮雖命世之學有是非之辯旻
居中振發曾無擁滯尚書令王儉延請僧宗講涅槃經
旻扣問連環言皆摧敵儉曰昔竺道生之難道融當時
服其英秀今旻師言必興詰能使前無橫陣便是過之
文宜嘗請柔次二師於普弘寺共講成實大致通勝冠
蓋成陰旻於末席議論詞旨清新致言宏邈往復神應
聽者傾囑次公乃放麈尾而歎曰老夫受業彭城久爲
難窟每恨不逢勁敵自至金陵累年不意見竭於今日
也其爲勝流所推服如此永明十年始於興福寺講成

實論山栖邑寺莫不掩扉畢集希風慕德者不遠萬里
相造自晉宋相承凡議論者多高談大語競相誇卑及
是爲師範稜落秀上機變如神言氣與正座無洪聲之
侶重以性多謙讓未嘗以理勝加人處衆澄腴如入禪
定天監五年復遊都輦天子禮接下筵詔與法龜法雲
汝南周捨等入華林園道義又勅於惠輪殿講勝鬘經
帝自臨聽仍選才學道俗三十人同集上定林寺抄一
切經論以類相同凡八十卷皆令取要於是尋感風疾
詔遣還吳閶處一室簡通豪右時蕭昂出守吳興過山

展禮。是從後門遁去。大通八年卒於所住。世壽六十有
一。初。旻嘗樂於禪默。乃依所立義。試遍安心旬日之間。
遂得入定。問諸禪師。皆云。門戶雖殊。造寂不異。旻笑言。
美善舉止。吐納膏腴。自生。顧盼風飈。滿室。凡所施爲。不
爲名利。勤注教易。發於言晤。宜其爲人天所師也。所著
論疏雜集。四聲指歸詩譜決疑等。百有餘卷。行於世。

慧皎

慧皎。未詳氏族。出家會稽嘉祥寺。春夏弘法。秋冬著述。
撰涅槃義疏十卷。及梵網經疏。行世。又以唱公所撰名。

僧頗多浮沉因遂開例成廣著高僧傳一十四卷其序略云前之作者或嫌以繁廣刪減其事而抗迹之奇多所遺削謂出家之士處國賓王不應勵然自遠高蹈獨絕尋辭榮棄愛本以異俗爲賢若此而不論竟何所紀又云自前代所撰多曰名僧然名者本實之賓也若實行潛光則高而不名若寡德適時則名而不高名而不高本非所紀高而不名則備今錄故省名音代以高字傳成通國寶之實爲龜鑑文義明約卽世崇重後不知所終

僧喬

僧喬姓華氏，吳興東遷人。出家龍光寺，聞僧旻說前修立義有諸同異，則忘寢息，志欲稟受。又聽其語論轉捷，則撫掌累歎，思與偕也。隆昌之世，法筵轉少，乃與同寺僧整輩請旻移住。於是終晨竟夜，一意咨求，布被禦冬，單蔣藉體，饘粥糊口，茹菜充飢，而未嘗以貧寒變節。但自勤勵，維日不足，研精奧粹，理悟深明。三四年間，經論通達，後旻還莊嚴，或問旻曰：「諸少相携，並得成器，其間勝負可得聞耶？」旻曰：「喬公儒雅清虛，履今用古，卷舒文

義優游教理鉤深致遠善能警校謙而未講莫與爭先
此乃遺法之所寄也其他卽有出羣倘與並馳皆瞠乎
後矣喬學旣成不修世務不附名聞閉門靜處坐無雜
客澄懷潛悟獨得而已卒年僅三十有六法輪未轉遽
入涅槃翹心龍象者至今惜之

慧開

慧開姓袁氏海鹽人出家宜武寺爲龍公弟子從學阿
毘曇成實論建武中遊學上京止道林寺歷聽藏是二
公經教後移住彭城學無時習經耳不忘造次之機缺

無對辯人間席上訥其辭也後忽胡略前習專攻名教
及至解微析奧應變無窮雖逢勁敵雄辯罕有折其角
者講席基連學人影赴遂使義虎之聲達於四部彭城
劉業出守晉安知開屢空餉錢一萬卽贍貧寒不終一
日開性疎率不事形儀衣裳塵滓未嘗舉意浣濯同旅
有不耐者皆代其解澣寒則披絮待成夏則隱席至燥
以天監六年卒住世僅三十九年

法開

法開姓俞氏餘杭人稚年出家北倉寺爲曇貞弟子尋

負笈西遊、從系次二公、學成實論、衣不蔽形、食纔支命、而不避寒風暑雨、以晝係夜、歷業既優、精解無碍、或遇勍敵、揖而不攻、有時竊發、潛登以掩、不備、嘗其鋒者、罕不結舌、由是顯名、後還餘杭、止於西寺、講筵相接、道俗歎服、沙門智藏、後遊禹穴、講化成論、開往觀之、鯁難累日、賓僚餐悅、藏曰、開法師語論已多、自可去矣、吾欲入定、開曰、釋迦說法、多寶涌現、法師指南、命衆而遣、客何耶、藏有慚色、以普通四年卒、世壽六十有五、

慧基

慧基錢塘人。幼而俊逸。宋文帝率公卿送之雉落。講宣經教。德被三吳。尋栖山陰法華寺。學者千人。元徽初。卽龜山建寶林寺。啟普賢藏法。高士周顒劉楨張嶠並摺衣問道。司徒文宣王欽其風德。致書殷勤。訪以法華宗旨。基乃著法華義疏。齊建武三年卒。世壽八十有五。初基寢疾。弟子夢見梵僧數人。皆跏趺坐。問所從來。答云。從大乘國來。奉迎基和尚去耳。後數日而基亡。因窆於法華山南廬江何胤爲造碑文於寶林寺。以銘遺德云。

曇光

曇光會稽人。隨師止江陵長沙寺。通五經。工詩賦。筭數。卜筮。無不貫解。年將三十。喟然歎曰。吾從來所習。皆是俗事。佛法深理。未染一毫。豈剪落所宜耶。乃屏舊業。聽諸經論。識悟過人。一聞便達。時宋衡陽王義季鎮荊州。求覓意理沙門。共談佛法。鑒境推光。以當鴻任。每設齋會。無有導師。王謂光曰。獎導羣生。惟德之大。上人何辭。光乃廻心習唱。製造懺文。每執爐處。衆輒道俗傾仰。後還都。止於靈味寺。宋明帝嘗於湘宮設會。聞光唱導。解善。卽勅賜三衣瓶鉢。卒於寺中。年六十五。

道慧

道慧姓王氏，餘姚人。出家爲僧，遠弟子。年十四，讀廬山慧遠集，慨然歎息，恨有生之晚，遂與同學智順、沂、流、千里、覲、遠遺迹，憩廬山西寺，涉歷三年，更還京邑。時王處辨三相義，慧詰難之，文采葩流，義旨弘暢，聞者心折。又就學猛公，猛嘗講成實論，爲張融所難，猛使慧以象輪當之，挫其風氣，融大歎服。褚澄謝超宗名重當時，咸以師禮事之。齊建元三年卒，年僅三十有一。臨終呼取麈尾以授智順，順勸曰：「如此之人，年不至四十耶？」因以麈

尾納棺中而歛葬於鍾山之陽謝超宗爲造碑銘

僧柔

僧柔姓陶氏丹陽人少耿介有出塵之想出家爲弘釋弟子精勤戒品委曲禪慧大小諸經無不洞其宗要年過弱冠便登講座一代名賓並投身北面後東遊禹穴人制白山靈鷲寺未至之夜沙門僧緒夢見神人彩旗素甲滿山而出緒問其故答云法師當入故出奉迎明日柔至遂掃飾山門有終焉之志敷經導學有士如林文惠文宣並服膺入室柔秉德居宗富之勿讓常誓生

安養每至懸輪西次轉頻客舍掌至臨亡之日體無
患唯語弟子云吾應去矣仍展席於地西向虔禮奄然
而卒世壽六十有四葬於山南沙門僧佑立碑墓所東
甕劉勰製文

智順

智順姓徐氏瑯琊臨沂人年十五出家事鍾山延賢寺
智度爲師少而聰穎篤志過人雖年在息孳學功已積
及受具戒秉禁無疵陶練衆經而尤獨步於涅槃成實
講說徒衆常數百人後東遊禹穴止於雲門精舍法輪

之盛復見江左天監六年卒於山寺世壽六十有五有
順之疾甚不食多日一時中竟忽索齋飯弟子曇和以
順絕穀日久密以半合米雜煮以進順咽而還吐索水
洗漱語和云汝永出雲門不得還住其執節精苦皆如
此類遺命露骸空地以施蟲鳥門人不忍乃窆於寺側

慧集

慧集吳興於潛人俗姓錢氏年十八於會稽樂林山寺
出家仍隨慧基法師受業爲性慤實言無華綺而學勤
昏曉未嘗懈怠後出京止於招提寺復遍歷衆師融治

異說三藏方等並皆總貫廣訪大毘婆沙及雜心經等以相警校故於毘曇一部擅步當時凡碩難堅疑處爲披釋海內學徒無不畢至每一開講負笈者常數千人沙門僧旻法雲並名高一代亦執卷請益尋還烏程遶疾卒世壽六十所著毘曇大義疏十餘萬言盛行世

曇超

曇超清河人初止龍華寺元嘉末南遊永興徧觀山水獨宿松下虎兇不傷尋遁靈隱寺一定累日忽見一人來禮曰弟子居在七里灘以富春人採石山下傷壞

室羣龍共忿誓三百日不雨今已百日田池枯涸欲
大德前行必能感致甘雨潤澤蒼生也超遂南行至赤
亭山下爲龍咒願至夜羣龍化人前來禮足超更說法
因乞三歸其夜超夢云本因忿立誓師旣導之以善不
敢違命明日晴時當雨至期沾足永明十一年卒

曇斐 明慶附

曇斐會稽王氏子少出家受業於慧基法師性聰敏素
著領牒之稱方等深經皆所綜達老莊儒墨頗亦披覽
後東西臬訪備窮經誥之旨居於法華臺寺講說相仍

學徒成列斐神情秀拔聲辯高華席上之風見重當世
異國張融汝南周顒廬江何胤並結知音之狎天監十
七年卒世壽七十有六時餘姚有明慶比丘與斐同時
致舉慶戒行嚴潔學業清美本師事炎公又弘實弟子
師資三業並見重東南

僧從

僧從不知何許人稟性虛靜隱居始豐瀑布山學兼內
外精修五門不食秦梁惟餌棗栗年垂百歲而氣力休
羸禮誦無輟與隱士褚伯玉爲林下之交每論道說義

輒留連信宿、後終於山中、

法匱

法匱於潛人、姓阮氏、少出家京師枳園寺、爲法楷弟子、
匱性恭默、少語言、樸然自守、不關人事、禮誦法華經一
部、每齋會得覲聚、以造旂檀像一軀、像成、自設大會、其
家僑居大市、是旦還家、又至定林、復還枳園、後三處考
覈、皆見匱來、中食實是一時、而三處赴焉、爾日晚還房
卧、奄然而卒、尸甚香、軟手屈二指、衆咸悟其得果、時猶
爲沙彌、而靈迹殊異、遂聞於武帝、帝親臨幸、爲會像設

供管理殯葬百姓雲赴觀施重叠仍以所得利養起枳
園寺塔是歲齊永明七年也

慧明

慧明姓康氏本康居人祖世避地於東吳明少出家章
安東寺齊建元中與沙門共登赤城山石室見猷公尸
骸不朽而禪室荒蕪高踪不繼乃催人開剪更立堂室
於是杻心禪誦畢命枯槁後於定中見一女神自稱呂
姥云常加護衛或時有猿鹿蛇虎之羣皆作銀色遊戲
堦前馴伏宛轉不令人畏齊文宣王聞風祗挹頻遣三

便服動教請乃暫出京師到第文宣事以師禮旋辭還山以微疾卒世壽七十

僧瑜

僧瑜錢塘人出家廬山嘗曰結果三塗情形故也情將盡矣形亦宜捐乃誦藥王品焚身火至合掌不散紫氣騰空室中倏生蓮理雙桐其徒以爲娑羅寶木因號爲雙桐沙門平南長史吳郡張辯爲之讚曰悠悠玄機茫茫至道出生入死孰爲妙寶

其一

自昔藥王殊化絕倫

往聞其說今親斯人

其二

英英沙門慧定心固凝神紫

氣表達雙樹 其三

其德可樂其操可貴文之作矣式

髣髴 其四

智稱

智稱河東人姓裴氏魏冀州刺史徽之後祖世避難
居京口稱幼而慷慨頗好弓馬嘗隨王玄謨北討獫狁
每至交兵血刃未嘗不心懷惻怛事寧解甲遂從印公
剡度時年三十有一乃專精律部研構毘尼尋以避亂
移卜京師遇穎公於興皇講律稱咨決隱遠發言中
時之席莫不驚嗟後餘杭寶安寺釋僧志請稱題

開講十誦雲栖寺復屈爲寺主稱乃受任少時舉其綱目示以憲章爲衆宜弘講律耆年尊宿清德勝流幾千百人莫不執卷承旨說法之音日與江潮俱震尋還本處憩安樂寺法輪常轉講大本四十餘遍永明三年卒世壽七十有二所著誦義記八卷盛行於世

慧進

慧進姓姚氏吳興人少而雄勇任性遊俠年四十忽悟心自啓遂爾離俗止高座寺誓誦法華用心勞苦執卷輒病乃發願造法華百部以悔前障始聚得錢一千六

育文時有劫來問進有物否答云惟有造經錢在佛處
羣劫聞之赧然而去於是聚集信施得以成經滿足百
部經成之後病亦小差誦法華一部得過誓願既滿觸
操逾堅常起諸福業願生安養未亡少時忽聞空中聲
曰汝所願已足必得生西方也隨無病而逝世壽八十
有五

弘明

弘明山陰人止雲門寺誦法華經瓶水自滿有童子自
天而下供使令虎無時入室自卧起如畜狗然嘗有一

小兒來聽經、明爲說法、俄不見、又有山精忽來指笑、明
捉得、以蒂繫之、久不得脫、曰、放我、我不敢復來、於是釋
之後、住永興紹元寺、又住栢林寺、飛錫所至、學徒雲集、
法鼓之聲、震於四部、

普遼

普遼、遼東人、振錫東游、至於白郎岩、見林嶂幽邃、遂結
庵以居、忽一夜、有神來告曰、某江白郎神也、此吾所居、
以師有德、推以相奉、故建寺、號曰白岩寺、唐長慶四年
大旱、令白餘豐禱於寺中、有異物似龍、自穴而出、寶曆

初再禱亦然

嵩頭陀

嵩頭陀名達摩。梁天監中來居婺州雙林。北四十里岩谷間。爲創香山寺。及建靈刹。道俗萬衆共引麻紵。舉刹。作忽中斷。引者無不顛躓。師曰。有何魔事。使之然乎。因以鉢盛淨水。內外攪之。咒而作禮。捧鉢繞刹一週。刹乃不假人工。屹然自立。後又至萊山立寺。師嘗曰。萊山王而不久。香山久而不王。後悉如其言。未幾留鐵魚磬於萊。而西至龍丘入滅。

道琳

道琳會稽山陰人。少出家。有戒行。精於禪理。吳國張繼
禮事之後。居富陽林泉寺。常有鬼怪。自琳居之。絕響。弟
子慧韶爲屋所壓。頭陷入胸。琳爲祈請。詔夜見兩胡人
拔出其頭。旦遂平復。琳於是設聖僧齋。鋪新帛於禪床
上。齋畢。見帛上有人跡。長三尺餘。衆咸服其徵。感富陽
人始家家立聖座。以飯之。梁初。出居齊熙寺。天監十八
年卒。春秋七十有三。

法慧 雲學附

法慧山陰人持律甚嚴隱禹穴天柱峯誦法華經足不履人間者三十年爲周顒所師禮王公貴人得一譏面以爲美談時有曇學者有青操與慧同游卽秦望之地爲庵號樂林精舍

洪偃

洪偃姓謝氏山陰人風神穎秀弱齡悟道及長遊京邑遍聞數論後值龍光寺綽法師便委心受業特加賞接以爲絕倫由是學侶改觀轉相推伏二三年中便盡幽奧乃開筵聚衆闡揚成實後學舊齒稽疑了義橫經頂

及者無不虛往實歸當時義貌詩書號爲四絕會武帝
發講重雲延德肆問而偃年非宿老座次甚遠抗言高
論精理入神帝賞歎者久之屬戎羯陵踐因避地緡雲
及齊使通和舟車相接崔武子等擅出境之才議其瞻
對衆莫能舉世祖以偃內外優數可與抗言勅令統括
賓禮偃才詞宏逸辯論旁馳潤以真文引之慈寄子武
等頃受誥命銜佩北蕃帝嗟賞厚惠更倍恒度皆推以
還公一無所納天嘉五年卒於宜武寺世壽六十有一
遺命屍骸尸陀以飼飛走偃始自離俗迄於遷化唯學

是務儉節。掃衣弗事。華縠無緣。情觸興輒敘。其致而文。采洒落罕有。嗣者文集二十餘卷。陳學士何儁尚之。封於秘閣。

真觀

真觀錢塘人。生有奇相。舌橫綺文。掌分仙人字。兄事智者。居南天竺。時諺曰。錢塘有真觀。當佛去一半。嘗感鼻亭神。請講法華經。捨祠爲刹。能使盥水滴地。不濡增一紀壽。

僧護 僧佑附

僧護刻人住石城山隱岳寺。寺北有青壁千餘丈。護每
至其下。輒聞管絃聲。或發光幢。卽發誓願。就青壁鑄
丈佛像。以齊建武中用工。請同衣僧佑授其準式。經年
始成。面像俄卧疾。臨終誓曰。再生當就吾志。久之建安
王開始興。令陸咸感刻溪之夢。以僧護所造石像奏。卽
詔佑董其事。天監十五年告成。或云建安王護後身也。

傳大士

傳大士名翕。字玄風。義烏稽亭里人。因捕魚溪上。與
頭陀會。頭陀誡令。照水乃見。國光寶蓋。卽悟前因。因

修道之地。頭陀指山下雙構木曰。此可矣。因結庵苦行。七年。感三佛來自東方。各乘金色相輪。自天而下。集於其身。自是身常出妙香。時聞空中聲。偈梁武帝詔赴闕。入重雲殿。不拜。竟登寶座。與帝問答。憲司譏問。但云。法地無動。若動則一切不安。四方衲子。無不宗其禪唱。其言以白衣弘法者。淨名之後一人而已。

定光

定光。青州人。字靜照。耳過其頂。手擎銀像。長立不卧。梁太興初。隱佛隴三十年。人罕知者。初智顗在江陵。夢光

引至山頂曰汝當住此汝當終此及頤遇佛龐光曰盛
昔在時招手石頭卽悟光曰金地吾已居之銀峯爾
往今修禪寺是也陳大建十三年坐滅凡三座體骨顯
出龕居乃已

明徹

明徹錢塘人青年難染嗜性通解嗜讀道安傳歎曰人
生居世復那可不爾乎從旻師學洞明奧旨武帝引入
內殿擢聚律要兩宮周供備沐恩獎臨終帝爲作三百
僧會給東園秘器以葬

曇穎

曇穎會稽人少精戒行誦經十餘萬言止長干寺乃心
平等一以善誘爲先故屬意宣唱天然獨絕張暢聞而
歎曰辭吐流便足騰遠理後卒於所住世壽八十有一
警韶 慧藏附

警韶姓顏氏會稽人學年入道事叔僧廣爲師受戒護
持如掌油鉢少長游方便能清論歷叅名宿廣綜衆家
年二十三講大品經味法當時肩摩溢道時外國三藏
真諦法師解談大小行說自他一遇欣然與共談論誦

歎曰吾遊國多矣，罕值斯人，仍爲翻新金光明經并義
識論，朝授晚傳，夜聞晨說，世諺寫經重出，知什再生者
也。天嘉四年，有會稽釋慧藻同泰道倫等二百餘人，連
署請詔，長講於白馬寺，廣弘傳化，十有餘年。既登耳順，
便令慧藻續講歸志山林，乃入幽岩自靖。至德元年，右
脅而去世，壽七十有六。

智顗

智顗，諱川人，字德安，十歲誓佛前，願荷正法。十八從湘
州果願寺沙門法緒薙落，一日夢岩崖萬重，雲日半垂。

其側滄海泓澄在於其下又見一僧伸臂舒手挽顓上山顓每以所夢語人咸曰此會稽天台山也顓乃杖錫往游遂達定光住處光見顓至欣然慰接且曰大善知識憶吾早年山上握手相招否乎顓驚悟作禮始知通夢之有在也又聞鍾聲滿谷衆咸惟異光曰鍾是召集有緣爾應得住顓乃卜佛隴山南螺溪之源結庵以居獨坐華頂峯上習靜頭陀忽大風拔木雷霆震吼魑魅千羣一形百狀持矛吐火駭畏雜陳乃抑心安忍湛然定又患身心煩痛如被火燒又見亡歿二親枕顓

王陳苦求哀顗又依止法忍不動如山久之強軟兩緣
倏然都滅忽一胡僧前告曰制敵勝怨乃可爲勇每夏
常講淨名經忽見三道寶階從空而降有數十梵僧乘
階而下入堂禮拜手擎香爐遶顗三匝久之乃滅後示
寂石城其徒歸骨佛隴顗嘗著止觀十卷緇流宗爲天
台教天聖中詔求其書賜名天台總錄

灌頂

灌頂章安人字法雲號章安禪師聆智大師所說法了
無遺忘嘗入都講演義疏晉王親爲軍持添水尋送還

山爲建國清寺。今爲天宮第五祖。師先是同門智勝病絕。復蘇。其徒問曰。師適往何處。曰。吾往覓率天上。見先師智者。坐蓮花寶座。旁皆有人。惟有一座尚虛。問天人云。六年後。淮頂當升。此說法及化果如其言。

慧約

慧約。義烏人。母夢吞金像而生。膚體粲然。因名靈粲。兒童時。聚沙爲佛塔。壘石爲高座。七歲。便求入學。鄉土以蠶桑爲業。見其纏縛而死。常懷悲惻。由是不服繅績。常歎曰。飛走之類。去人不遠。好生惡死。此情何別。乃絕足。

羗年十七事南林沙門慧靜。受具薙落。始更名慧約。字
德素。齊侍中樓幼瑜約之叔祖也。每見輒起爲禮。或問
此乃君族下班。何爲致恭。若是。瑜曰。菩薩出世。方爲人
天師。豈老夫致敬而已耶。時人未喻斯旨。惟王文憲深
以爲然。後居山陰天柱寺。周顒爲剡令。去官。携之入都。
居於草堂。沈約一見。以爲道安惠遠無以尚之。沈守東
陽。隨歸葬親墓。成游金華。住赤松澗。餌藥斷穀。所進麻
糲而已。沈代復隨往草堂。梁武帝延約於等覺殿。受菩
薩戒。頂禮而請曰。弟子頂禮。勿使外人知之。約遂浴身。

人。澡。瓶。中。結。脚。跌。坐。見。五。色。雲。臺。顯。出。謂。帝。曰。貧。道。化。身。入。瓶。中。陛。下。亦。毋。令。外。人。知。之。帝。遂。北。面。受。戒。親。執。弟子之禮。稱曰智者國師。永同元年九月六日示疾。謂弟子曰。我夢四部大衆。幡花羅列空中。迎我凌雲而去。福報當訖。至十六日。武帝勅遣舍人徐儼。齎疾答云。今夜當去。至五更二唱。異香滿室。合掌便入涅槃。春秋八十有四。詔葬獨龍山。又臨終之夜。所乘青牛。忽然鳴。吼。淚下。葬日亦然。四衆無不歎異。

慧榮

慧榮姓顧氏山陰人梁大通初辟觀出聽時建初彭城
盛弘成實素未陳略卽盡清辨一衆歎嗟稱爲義虎自
是業專勇鎧聲稱彌遠卽而講悟學者歸之乃大弘法
席廣延緇素時梁儲在座素不識之令問講者何名乃
抗聲曰禹穴慧榮江東獨步太子不識何謂諸君一座
掩耳榮從容如舊傍若無人後與諸徒衆還歸故邑奉
邑道俗欲光其聲價大集諸衆令其暨義榮曰余學廣
矣輒暨恐致餘弊任衆舉其義門然後標據衆以其傳
達矜尚乃令暨八十種好謂必不能誦持榮卽部分上

下以法繩持。須臾。牒數列名。出體。會難。激盡。無成。濟。晚。又出都講。授至德末。卒於江都。

法會

法會義烏奉國里人。仕齊梁間。官至雲麾將軍。武帝時。棄官爲僧。自金陵携巨鍾。長剎東還。聞傅大士神異。率八十餘人。往丐食。大士給以一簞飯。衆飽而飯有餘。會歎服。以鍾獻乞爲弟子。大士持鍾。自松山頂擲之溪潭中。謂曰。汝緣在彼會。卽其處。宴坐巨石。信向甚衆。爲立精舍於溪濱。卽法惠院也。因名其潭曰聖鍾潭。

普明

普明會稽人少小志操不凡有僧乞食因云郎子既有善性可向天台山出家其中有初依菩薩在彼說法遂以陳太建十四年踰山越澗來入天台正值智者登座說法智者笑云宿誓願力今得相遇所住房頭空地純是礧石明乃懷念曰若令此石出水豈不快乎以杖叩之應聲泉涌周給東西無不沾其潤澤明以講堂狹小欲毀廣之嫌爲樹木所蔽感動山王晨朝摧樹傾枝濶百步許一日清晨呼諸弟子曰夫人壽命不可常保汝

等宜知便自脫新淨之衣着其破者換衣纔竟奄然就滅

僧安

僧安不知何許人戒律精苦坐禪講解時號多聞嘗在王屋山講涅槃經始發題有一雌雉來座側伏聽僧若食時出外飲啄日晚上講依時赴集三卷未了遂絕不至衆咸怪之安曰雉今生人道不須怪也升平四年安領徒衆至越州行頭陀忽云往年雌雉應生於此逕至一家遙呼雌雉一女走出如舊相識禮拜歡喜女父母

異之引入設食問故安爲述本緣久聞涕泣苦求出家
二親欣然許之安爲講涅槃便領師一無遺漏至後三
卷茫然不解

稠錫

稠錫義烏人居稠岩山中頂曰上岩麓曰下岩一日冥
坐聞膝間有嬰兒聲知俗緣不了乃叱開藜木脫衣寄
之木合如故下山娶妻生子以酬宿業復叱木取衣爲
大沙門後不知所往